

Morning Dogri (NSD) National News Bulletin 10-08-2024

आकाशवाणी

- प्रधानमंत्री नरेन्द्र मोदी होर अज्ज वायनाड केरल दा दौरा करियै राहत ते बचाह दे कम्में दा जायजा लैंगन।
- केन्द्रीय मंत्रिमंडल नै प्रधानमंत्री आवास योजना शैहरी दे दुए गेड़ दी योजना गी मंजूरी दित्ती ऐ। शैहरी गरीबे ते मध्यम वर्गिएं परोआरें लेई इक करोड़ मकान बनाए जांगन।
- आर्थिक मामलें दी मंत्रिमंडली कमेटी नै 24 ज्हार 657 करोड़ रुपे दी लागत आली 8 रेल परियोजनाएं गी मंजूरी दित्ती।
- राष्ट्रपति द्रौपदी मुर्मू होर अज्ज तिमोर लेस्ते दे बड्डे नेताएं कन्नै अज्ज दपक्खी बैठकां लांगन।
- विदेश मंत्री डॉ. एस.जयशंकर होरें आखेआ ऐ जे भारत दी “गोआंड पैहल” आली नीति च मालद्वीप महत्वपूर्ण थाहर रखदा ऐ।
- भारतीय पलोआन अमन सहरावत सब्बने शा घट्ट उमरी च व्यक्तिगत ओलंपिक्स मैडल जित्तने आले पैहले भारतीय एथलीट बनी गे न।

<><><><><><>

PM-Kerala

प्रधानमंत्री नरेन्द्र मोदी होर अज्ज केरल दे वायनाड च राहत, बचाह ते पुर्नवास दे कम्में दा जायजा लैंगन। उंदा कन्नूर जाइयै उत्थुआं वायनाड दे हाड़ें ते ल्हास पस्सियां पौने कारण प्रभावत इलाकें दा बहाई सर्वेक्षण करने दा बी कार्यक्रम ऐ। मोदी होर आपदा प्रभावत इलाकें दा दौरा करगंन, होए दे नुक्सान बारे जानकारी हासल करगंन ते राहत कैपें च प्रभावत लोकें कन्नै गल्लबात बी करगंन। उंदा अस्पताल जाइयै उनें प्रभावतें कन्नै बी मिलने दा कार्यक्रम ऐ, जिनेंगी बचाह दलें आस्सेआ सुरक्षत बचाया गेआ ते उंदा इलाज चलै करदा ऐ।

एहदे बाद प्रधानमंत्री होर इक जायजा बैठक लांगन जेहदे च उनेंगी घटना ते राहत कमें दे बारे च पूरी जानकारी दित्ती जाग।

<><><><><><>

Rev Overall Cabinet

केन्द्रीय मंत्रिमंडल, प्रधानमंत्री आवास योजना शैहरी दे दुए गेड़ दी योजना पीएमएवाई-यू-2.0 गी मंजूरी देई दित्ती ऐ। मंत्रिमंडलै प्रधानमंत्री आवास योजना ग्रामीण गी 2024-25 थमां 2028-29 तगर लागू करने गी बी मंजूरी दित्ती ऐ। कल रातीं मीडिया गी संबोधत करदे होई सूचना प्रसारण मंत्री अश्विनी वैष्णव होरें आखेआ जे प्रधानमंत्री आवास योजना तैहत 3 करोड़ नमें मकान बनाए जांगन। जिंदे च 2 करोड़ ग्रामीण इलाकें च ते इक करोड़ शैहरी इलाकें च बनाए जांगन। एहदे लेई बजट च 3 लख 60 जहार करोड़ रुपे दा प्रावधान होग। प्रधानमंत्री आवास योजना शैहरी 2.0 तैहत इक करोड़ शैहरी गरीबें ते मध्यम वर्गिय परोआरें गी माली सहायता दित्ती जाग। एह सहायता राज्यें ते केन्द्र शासत प्रदेशें ते प्राथमिक दोहार संस्थानें आस्सेआ मकान बनाने, खरीदने जां शैहरी इलाकें च 5 ब'रे आस्तै किराए पर लैने लेई दित्ती जाग। शैहरी इलाकें च कम्मकाजी महिलाएं आस्तै होस्टल ते आर्थिक कमजोर तबकें ईडब्ल्यूएस, एलआईजी ते एमआईजी गी 4 प्रतिशत सब्सिडी पर 25 लख रुपें तस्कर होम लोन लेई गी इस योजना च प्रावधान ऐ। मंत्रिमंडल च संशोधित प्रधानमंत्री जेआई-वैन योजना गी बी मंजूरी दित्ती जेहदे तैहत आधुनिक जैविक ईंधन परियोजनाएं गी आर्थिक सहायता दित्ती जाग। सूचना प्रसारण मंत्री होरें दस्सेआ जे एससी, एसटी आरक्षण पर सुप्रीम कोर्ट दे फैसलें पर मंत्रिमंडल नै चर्चा कीती। उनें दस्सेआ जे एनडीए सरकार बाबा साहब अम्बेडकर हुंदे संविधान च दस्से गेदे प्रावधानें लेई वचनबद्ध ऐ ते एहदे च क्रिमी लेयर दा कोई प्रावधान नेई ऐ ते मंत्रिमंडल दा फैसला ऐ जे संविधान मूजब आरक्षण च कोई बदलाव नेई कीता जाग।

<><><><><><>

CCEA Railways

प्रधानमंत्री नरेन्द्र मोदी हुंदी अध्यक्षता च लाई गेदी आर्थिक मामलें सरबंधी कैबिनेट कमेटी दी बैठका च रेल मंत्रालय लेई अंदाजन 24 जहार 657 करोड़ रुपें दी लागत आली 8 परियोजनाएं गी मंजूरी दित्ती गई ऐ।

इनें परियोजनाएं गी 7 राज्यें दे 14 जिलें च तोड़ चाड़ेआ जाग।

<><><><><><>

President

राष्ट्रपति द्रौपदी मुर्मू होर अज्ज तिमोर लेस्ते दे केई बड्डे नेताएं कन्नै दपक्खी बैठका लांगन। ओह तिमोर लेस्ते दी इक दिनै दी यात्रा पर अज्ज बडलै राजधानी डिली पुज्जियां। उत्थूं दे राष्ट्रपति जोसे रामोस होर्ता होरें डिली अंतर्राष्ट्रीय ब्हाई अड्डे पर आपूं उंदा सुआगत कीता। भारत दे कुसै राष्ट्रपति दी तिमोर लेस्ते दी एह पैहली पैहली यात्रा ऐ जेह्डी दक्ख पूर्ण एशिया च “गोआंढी पैहले” आली भारत दी नीति गी दर्शादी ऐ।

<><><><><><>

Jaishankar

विदेश मंत्री डॉ. एस.जयशंकर होरें आखेआ ऐ जे मालदीप कन्नै भारत दी दोस्ती ते सांझ-भ्याली इक दुए दे हितें गी ध्यानै च रखदे होई किट्ठे रलियै कम्म करने दी बुनियाद पर टिकी दी ऐ। मालदीप दे विदेश मंत्री मूसा जमीर हुंदे कन्नै माल च लग्गी दी उंदी बैठक दे बाद संवाददाता सम्मेलन गी संबोधत करदे होई डॉ. जयशंकर होरें आखेआ जे मालदीप भारत दी “गोआंढी पैहल” आली नीति दा इक महत्वपूर्ण लक्ष्य ऐ। अपने इक सोशल मीडिया पोस्ट पर बी डॉ. जयशंकर होरें लिखेआ जे मालदीप दे विदेश मंत्री हुंदे कन्नै उंदी गल्लबात साजगार माहौल च होई ते बड़ी सकारात्मक ते रचनात्मक रेही। उनें अगगे आखेआ जे विकास कम्में च सांझ भ्याली, समर्थ-निर्माण, क्षेत्रीय सुरक्षा, बपार ते डिजीटल सैह्योग पर प्रमुखता कन्नै गल्लबात होई ऐ। विदेश मंत्री होर त्रऊं दिनें दी मालदीप यात्रा पर कल संजा’लै राजधानी माले पुज्जे हे। इस ब’रे जून म्हीने प्रधानमंत्री नरेन्द्र मोदी हुंदे शपथ ग्रहण समारोह च शामिल होने लेई मालदीप दे राष्ट्रपति मोहम्मद मुइजु भारत आए हे।

<><><><><><>

Aman Olympics

अमन सहरावत नै कल पैरिस ओलंपिक्स दे इक मकाबले च डेरियन टोई क्रूज गी 13-5 कन्नै हराइयै कुश्ती च भारत लेई पैहला तगमा हासल कीता ऐ।

इस जित्त दे कन्नै गै अमन 21 साल ते 24 दिन दी उमर च भारत लेई व्यक्तिगत ओलंपिक्स मेडल जित्तने आले पैहले एथलीट बनी गे न। सब्बने शा लौहकी बरेसू च ओलंपिक्स मेडल जित्तने आले भारतीय खडारी दा रिकार्ड पैहले पी.वी.सिंधु दे नां हा, जिन्नै रियो ओलंपिक्स 2016 च 21 ब'रे 1 महीने ते 14एं दिनें दी उमरी च व्यक्तिगत चांदी दा मेडल जित्तेआ हा ते हुन अमन नै 21 ब'रे ते 24एं दिनें दी उमर च व्यक्तिगत मेडल जित्तिथै एह रिकार्ड अपने नां करी लैता ऐ।

<><><><><><>

Medal Greetings

राष्ट्रपति द्रौपदी मुर्मू, उपराष्ट्रपति जगदीप धनखड़ ते प॰धानमंत्री नरेन्द्र मोदी होरें पैरिस ओलंपिक्स च कैह दा तगमा जित्तने पर भारतीय पलोआन अमन सेहरावत गी ममारकबाद दित्ती ऐ। उनें अमन सेहरावत गी लिखे दे अपने संदेश च आखेआ जे उनें पूरे देश वासिएं दा दिल जित्ती लैता ऐ। गृहमंत्री अमित शाह होरें बी व्यक्तिगत ओलंपिक मेडल सब्बने शा घट्ट उमरी च जित्तने दा रिकार्ड बनाने पर अमन गी बधाई दित्ती ऐ।

<><><><><><>

ICG-Evacuation

भारतीय तटरक्षक दल आईसीजी दे जहाज सी-428 नै पोर्ट ब्लेपर दे कंडे ओलंपिया जी.आर. जहाज चा फिलीपीन चालक दल दे इक मिंबर गी सुरक्षत बाहर कड्डी लैता ऐ। समुंद्री बचाह तालमेल केन्द्र पोर्ट ब्लेपर गी कल इस जहाज च कुसै दे जबरदस्त बमार होने बारे मैडिकल इमरजेंसी आली जानकारी थोई ही जेहदे पर कारवाई करदे होई कोस्टल गार्ड नै अपना सी-428 जहार समुंद्रै च बचाह कारवाई लेई भेजेआ ते मरीज गी बाहर कड्डी आहनने च कामयाबी हासल होई।

<><><><><><>

PM Mitra Parks

केन्द्र सरकार 7 पीएम-मित्रा पार्क कायम करने की मंजूरी देती है। एह पार्क 2027-28 ब'रे तगर 4 जहार 445 करोड़ रुपें की लागत कन्नै ग्रीनफील्ड ते ब्राउनफील्ड आली थाहरें पर विश्व स्तर की ढांचागत सहूलतें कन्नै तैआर होई जांगन। कपड़ा राज्यमंत्री पबितरा मागहेरिता होरें राज्यसभा च दस्सेआ जे सरकारै विरुदनगर तमिलनाडू, वारांगल तेलंगाना, नवसारी गुजरात, कालाबुर्गी कर्नाटक, धार मध्यप्रदेश, लखनऊ उत्तर प्रदेश ते अमरावती महाराष्ट्र च पीएम मित्रा पार्कें गी मंजूरी देती है। पीएम मित्रा पार्क स्कीम तैहत डवैलपमेंट कैपिटल स्पोर्ट की सुविधा होग जेहूदे च प्रोजेक्ट की लागत दा 30 प्रतिशत केन्द्र आस्सेआ दित्ता जाग। इसलै भारत दा कपड़ा बजार 12 लख करोड़रुपे की कीमत दा है।

<><><><><><><>